

歲

時

廣

記

歲時廣記卷第二

廣寒僊裔陳

元靚

編

夏

禮記鄉飲酒曰南方曰夏夏之爲言假也養之長之假之仁也太玄經曰夏者物之修長也董仲舒策曰陽常居大夏以生育長養爲事淮南子曰夏爲衡衡者所以平萬物也前漢律歷志曰太陽者南方南任也陽氣任養物於時爲夏夏假也物假大乃宣平火炎上

禮者齊齊者平故爲衡也月令曰夏三月其
日丙丁其帝炎帝其神祝融其蟲羽其數七
其味苦其臭焦其祀竈祭先肺

孟夏月

禮記月令曰孟夏之月日在畢昏翼中旦婺女
中律中仲呂螻蝻鳴蚯蚓出王瓜生苦菜秀靡
草死麥秋至

三統歷曰立夏爲四月節小滿爲四月中氣小
滿者言物長於此小得盈滿

孝經緯曰穀雨後十五日斗指巽爲立夏後十五日斗指巳爲小滿

周書時訓曰立夏之日蜩螳鳴後五日蚯蚓出後五日王瓜生小滿之日苦菜秀後五日靡草死後五日麥秋至

白虎通德論曰四月律謂之仲呂何言陽氣極將彼故復中難之也晉志云呂者助也謂陽氣盛長陰助成功也

晉樂志云四月之辰謂之巳巳者起也物至此

時畢盡而起也

夏小正曰四月昴則見

詩七月曰四月秀葍注云不榮而實曰秀葍草也

西京雜記曰陽德用事則和氣皆陽建巳之月是也故陽謂之正陽之月又曰四月陽雖用事而陽不獨存此月純陽疑於無陰故謂之陰月纂要云四月曰首夏維夏

文選注鄭玄曰四月爲除月

月令曰孟夏行秋令則苦雨數來五穀不滋四
鄙入保行冬令則草木蚤落後乃大水敗其城
郭行春令則蝗蟲爲災暴風來格秀草不實

仲夏月

月令曰仲夏之月日在東井昏亢中旦危中律
中蕤賓小暑至螳蜋生鵙始鳴反舌無聲鹿角
解蟬始鳴半夏生木堇榮

孝經緯曰小滿後十五日斗指丙爲芒種後十
五日斗指午爲夏至

三統厯曰芒種爲五月節夏至爲五月中氣芒種者言有芒之穀可稼種也

周書時訓曰芒種之日螳蜋生後五日鵙始鳴後五日反舌無聲夏至之日鹿角解後五日蟬始鳴後五日半夏生

白虎通德論曰五月律謂之蕤賓何蕤者下也賓者敬也言陽氣上極陰氣始賓敬之也

晉樂志云五月之辰謂之午午者長也大也言物皆長大也

夏小正曰五月參則見蜋蜋鳴初昏大火中注
云大火心星名也

詩七月曰五月鳴蜋又曰五月斯螽動股注云
蜋蜋也斯螽蜋蜋也

吳子夜四時歌曰鬱蒸仲暑月

東坡詩云飛龍御月作秋涼注云謂五月也
月令曰仲夏行冬令則雹凍傷穀道路不通暴
兵來至行春令則五穀晚熟百螻時起其國乃
飢行秋令則草木零落果實早成民殃於疫

季夏月

月令曰季夏之月日在柳昏火中旦奎中律中
林鐘溫風始至蟋蟀居壁鷹乃學習腐草爲螢
土潤溽暑大雨時行

孝經緯曰夏至後十五日斗指丁爲小暑後十
五日斗指未爲大暑

三統歷曰小暑爲六月節大暑爲六月中氣小
暑大暑就極熱之中分爲小大月初爲小月半
爲大

周書時訓曰小暑之日溫風至後五日蟋蟀居
壁後五日鷹乃學習大暑之日腐草爲螢後五
日土潤溽暑後五日大雨時行

白虎通德論曰六月律謂之林鍾何林者眾也
萬物成熟種類眾多

晉樂志云六月之辰謂之未未者味也謂時萬
物向成有滋味也

夏小正曰六月鷹始摯

詩七月曰六月莎鷄振羽又云六月食鬱及薁

注云鬱棣屬萸萸也

纂要曰六月曰徂暑

月令曰季夏行春令則穀實鮮落國多風欬民
乃遷徙行秋令則上隰水潦禾稼不熟乃多女
災行冬令則風寒不時鷹隼蚤鷺四鄙入保

黃梅雨

風土記夏至雨名黃梅雨霑衣服皆敗黧四時
纂要云梅熟而雨曰梅雨又閩人以立夏後逢
庚日爲入梅芒種後逢壬爲出梅農以得梅雨

乃宜耕耨故諺云梅不雨無米炊瑣碎錄又云
芒種後逢壬入梅前半月爲梅雨後半月爲時
雨遇雷電謂之斷梅數說未知孰是又陳氏手
記云梅雨水洗瘡疥滅癰痕入醬令易熟沾衣
便腐澣垢如灰汁有異他水江淮以南地氣卑
濕五月上旬連下旬尤甚梅雨壞衣當以梅葉
洗之餘並不脫杜甫詩云南京犀浦道四月熟
黃梅湛湛長江去冥冥細雨來歐陽公詩云春
寒欲盡梅黃雨東坡詩云不趁青梅煮酒要

看細雨濕黃梅又云佳節連梅雨又云怕見梅黃雨細時王維詩云梅天一雨清

送梅雨

埤雅今江湘二浙四五月間梅欲黃落則水潤土溽柱礎皆汗蒸鬱成雨謂之梅雨自江以南三月雨謂之迎梅五月雨謂之送梅杜甫詩云石枕涼生菌閣虛已應梅潤入圖書

濯枝雨

風土記仲夏雨濯枝盪川注云此節常有大雨

名曰濯枝雨

畱客雨

陸機要覽昔羽山有神人焉逍遙于中嶽與左
元放共遊薊子訓所坐欲起子訓應欲畱之一
日之中三雨今呼五月三雨亦爲畱客雨

薇香雨

李賀四月詞依微香雨青氛氲膩葉蟠花照曲
門

暴凍雨

爾雅暴雨謂之凍郭璞注云江東呼夏月暴雨
爲凍雨離騷經云令飄風兮先驅使凍雨兮灑
塵凍音東

海颶風

南越志熙安間多颶風颶風者具四方之風也
常以五月六月發未至時雞犬爲之不鳴國史
補云南海有颶風四面而至倒屋拔木每數年
一至鄭熊番禺雜記云颶風將發有微風細雨
先緩後急謂之鍊風又有石尤亦此之類韓文

公詩云雷威固已加颶勢仍相借又云颶風有時作掀簸眞差事又云峽山逢颶風雷電助摧

掉颶音具

落梅花

風俗通五月有落梅風江南以爲信風李白詩云天長信風吹日出宿霧散

黃雀風

風土記南中六月則有東南長風至時海魚化爲黃雀故俗名黃雀風

麥黃水

水衡記黃河水四月名麥黃水

苽蔓水

水衡記黃河水五月名苽蔓水苽生蔓也東坡詩云河水恥縣苽蔓流

礬山水

水衡記黃河水六月名礬山水

麥熟秋

月令章句百穀各以初生爲春熟爲秋故麥以

孟夏爲秋山谷詩云生物趨功日夜流園林纔
夏麥先秋趙師民詩云麥秋晨氣潤槐夏午陰
涼

分龍節

圖經池州俗以五月二十九三十日爲分龍節
雨則多大水閩人以夏至後爲分龍雨各有方
龍生日

岳陽風土記五月十三日謂之龍生日栽竹多
茂盛又前輩作蒼筠傳曰筠每歲惟五月十三

日獨醉或爲人迎置它處不知也當時諺曰此
君經歲常清齋一日不齋醉如泥有時倒載過
晉地茫然乘墜俱不知宋子京種竹詩云除地
墻陰植翠筠疎枝茂葉與時新賴逢醉日終無
損正似德全于酒人晏元獻公詩云竹醉人還
醉蠶眠我亦眠又云苒苒渭濱族蕭蕭塵外姿
如能樂封植何必醉中移又東坡詩云竹是當
年醉日栽

竹迷日

筍譜民間說竹有生日卽五月十三移竹宜用
此日或陰雨土虛則鞭行明年筍篁交至一云
竹迷日栽竹年年生筍劉延世竹迷日種竹詩
云梅蒸方過有餘潤竹醉由來自古云掘地聊
栽數竿玉開簾還當一溪雲然則竹迷亦正此
日也陳簡齋種竹詩云何須俟迷日可笑世俗
情

櫻筍厨

唐輦下歲時記四月十五日自堂厨至百司厨

通謂之櫻筍厨又韓偓櫻桃詩注云秦中以三月爲櫻筍時陳后山詩云春事無多櫻筍來又古詞云水竹舊院落櫻筍新蔬果

臨水宴

因話錄李少師與賓僚飲宴暑月臨水以荷爲杯滿酌密繫持近人口以筋刺之不盡則重飲宴罷有人言昨飲大歡者公曰今日言歡則明日之不歡無論好惡一不得言

霹靂酒

醉鄉日月暑月候大雷霆時收雨水淘米炊飯
釀酒名曰霹靂酒

寒筵冰

醉鄉日月盛夏初夏於井側安鑊以大水晶一
塊大如拳無瑕釁者以新汲水熾火煮干沸取
越瓶口小腹大者滿盛其湯以油帛密封口勿
令泄氣復以重湯煮干沸急沉井底平旦出之
破瓶冰已結矣名寒筵冰

又見杜
陽雜編

壬癸席

河東備錄申王取猪毛刷淨命工織以爲席清而且涼號曰壬癸席

澄水帛

杜陽編同昌公主一日大會暑氣將甚公主令取澄水帛以水蘸之挂於高軒滿座皆思挾纈澄水帛長八九尺似布而細明薄可鑒云其中有龍涎故能消暑

冰絲襪

樂府雜錄唐老子本長安富家子生計蕩盡遇

老嫗持舊褌以半千獲之有波斯人見之乃曰
此是冰蠶絲所織暑月置於座滿室清涼卽酬
萬金

消涼珠

拾遺記黑蚌珠千年一生燕昭王常懷此珠當
盛暑之月體自清涼名消暑招涼之珠

辟暑犀

提要錄唐文宗夏月延學士講易賜辟暑犀章
簡公端午帖子云已持犀辟暑更門草迎涼

迎涼草

杜陽雜編李輔國夏於堂中設迎涼草其色類
碧而幹似苦竹葉細如杉雖若乾枯而未嘗彫
落盛暑束之窗戶間則涼風自至

白龍皮

劇談錄李德常夏日邀同列及朝士宴時畏景
赤曦咸有鬱蒸之苦既延入小齋列坐開樽煩
暑都盡颼風涼冽如涉高秋及昏而罷出戶則
大雲烈日熾然焦灼有好事者求親信問之云

此日以金盆貯水漬白龍皮置於座末龍皮者
新羅僧得之海中

犀如意

楊妃外傳唐元宗夏月授楊妃卻暑犀如意

灑皮扇

開元遺事王元寶都中巨豪也家有皮扇制作
甚精寶每暑月宴客卽以此扇置於座前以新
水灑之則颼然風生酒筵之間客有寒色遂命
撤去明皇亦曾差中使取看愛而不受曰此龍

皮扇也

服丸散

抱樸子曰或問不熱之道曰服玄冰丸飛雪散
王仲都等用此方也劉孝威苦暑詩云元冰術
難驗赤道漏猶長

環爐火

桓子新論元帝被病廣求方士漢中逸人王仲
都者詔問所能爲對曰但能忍寒暑耳因爲待
詔至夏大暑日使暴坐又環以十爐火不言熱

而身汗不出

入寒泉

括地圖天毒國最大暑熱夏草木皆乾死民善
沒水以避日遇暑時常入寒泉之下

激涼風

唐書拂林國盛暑之節乃引水潛流上通於屋
宇機制於巧匠人莫之知觀者唯於屋上聞泉
鳴俄見四檐飛湍懸波如瀑激氣成涼風

沒水底

抱樸子葛洪從祖僊公每大醉及夏天盛熱輒入水底入日乃出正以能閉氣胎息耳

開七井

雲林異景志霍仙鳴別墅在龍門一室之中開七井皆以雕鏤盤覆之夏月坐其上七井生涼不知暑氣

乘小駟

開元雜記玄宗幸洛至綉嶺宮時屬炎暑上曰姚崇多計令力士探之回奏曰崇方衫絺乘小

駟按轡木陰上乃命駟頓忘繁溥

臥北窗

晉書陶潛字淵明諡靖節先生嘗言夏月虛閑
高臥北窗之下清風颭至自謂羲皇上人東坡
詩云一枕清風值萬錢無人肯買北窗眠又云
只應陶靖節會買北窗眠又云北窗仙人臥羲
軒又云北窗高臥等羲炎

書新裙

南史羊欣字敬元長於隸書父不疑爲烏程令

欣時十五王獻之爲吳興守甚知愛之嘗夏月
入縣欣著新練裙晝寢獻之書裙數幅而去欣
本攻書因此彌善東坡詩云載酒無人歌子雲
掩門晝臥客書裙翟公遜睡鄉賦云客書裙而
滿幅

作夏課

南部新書長安舉子落第者六月後不出謂之
過夏多借清淨廟院作文章曰夏課時語曰槐
花黃舉子忙

又見秦中記

遜齋閒覽云謂槐之方花

乃進士赴舉之日也唐翁承贊詩云雨中裝點
望中黃勾引蟬聲送夕陽憶得當年隨計吏馬
蹄終日爲君忙又稼軒詞云明年此日青雲路
卻笑人間舉子忙

遂樹陰

北齊書僕射魏收字伯起初習武不成改節讀
書夏日坐板牀隨遂樹陰誦讀累年牀爲之銳
遂工辭令也

練螢囊

晉陽秋車胤字武子家貧讀書不常得油夏月
則以練囊盛數十螢以夜繼日

頒冰雪

止戈集長安冰雪至夏月則價等金璧每頒冰
雪論筐不復償價日日如是

賜朱櫻

唐史李適爲學士見天子饗會遊豫唯宰相及
學上得從夏宴蒲萄園賜朱櫻

獻雪瓜

唐列傳明崇儼以奇技自名高宗召見甚悅盛
夏帝思瓜崇儼坐頃取以進自云往陰山取之
四月帝憶瓜崇儼索百錢須臾以瓜獻曰得之
緱氏老人圃中帝召老人問故曰埋一瓜失之
土中得百錢

沈瓜李

魏文帝與吳質書浮甘瓜于清泉沉朱李于寒
水杜詩云翠瓜碧李沉玉甃注云玉甃井也

賦杞菊

提要錄陸龜蒙自號天隨子常食杞菊及夏月
枝葉老硬氣味苦澁猶食不已因作杞菊賦以
自廣云爾杞未棘爾菊未莎其如余何東坡詩
云飢寒天隨子杞菊自撚毫

調寢餽

攝生月令四月爲乾萬物以成天地化生勿冒
極熱勿大汗後當風勿暴露星宿以成惡疾勿
食大蒜勿食生薤勿食雞肉蛇蟾是月肝藏以
病神氣不行火氣漸臨水力漸衰稍補腎助肝

調和胃氣無失其時

埋蠶沙

河圖四月收蠶沙於宅內亥地埋之令人大富
得蠶又甲子日以一碩三斗鎮宅令家財千萬

求蛇醫

蛇醫卽蜥蜴也

酉陽雜俎王彥威鎮汴地之二年夏旱季玘過
汴因以旱爲言季醉曰欲雨甚易可求蛇醫四
頭石甕二枚每甕實水浮二蛇醫以木爲蓋密
泥之置子閒處甕前後設席燒香選小兒十歲

以下十餘人令執小青竹晝夜更擊其甕不得
少輟王如其言試之一日兩夜雨大注數百里
舊說龍與蛇醫爲親家焉又張師正倦游錄云
熙甯中京師久旱按古法令坊巷以甕貯水插
柳枝泛蜥蜴小兒呼曰蜥蜴蜥蜴興雲吐霧降
雨滂沱放汝歸去翰府名談云宋內翰祁鎮鄭
州夏旱公文祭蜥蜴於祈所卽時大雨告足民
乃有秋東坡詩云甕中蜥蜴爲可笑

占蝗旱

四時纂要四時辰雨皆爲蝗蟲大雨大蟲小雨
小蟲二日雨百草旱五穀不成三日雨小旱風
從西來麻吉四日雨五穀貴五日六日雨有旱
處四日至七日風者大豆吉八日微雨熟俗云
八日雨斑闌高低田可憐此月自一日至十四
日惡風者皆不可種豆

歲時廣記卷第二

歲時廣記卷第三

廣寒僊裔陳

元靚

編

秋

禮記鄉飲酒曰西方曰秋秋之爲言愁也愁之以時察守義者也太玄經曰秋者物皆成象而聚也管子曰秋者陰氣始下故萬物收說文曰秋禾穀熟也淮南子曰秋爲矩矩者所以方萬物也前漢律厯志曰少陰者西方西遷也陰炁遷落物也於時爲秋秋韞也物

黷斂乃成熟金從革

改更也

義者成成者方故

爲矩月令曰秋三月其日庚辛其帝少皞其神蓐收其蟲毛其音商其數九其味辛其臭

羶其祀門祭先肝

穀子由反

孟秋月

禮記月令曰孟秋之月日在翼昏建星中旦畢中律中夷則涼風至白露降寒蟬鳴鷹乃祭鳥天地始肅農乃登穀

孝經緯曰大暑後十五日斗指坤爲立秋後十

五日斗指申爲處暑

三統歷曰立秋爲七月節處暑爲七月中氣處暑者謂暑將過伏而潛處也

周書時訓曰立秋之日涼風至後五日白露降後五日寒蟬鳴涼風不至國無嚴政白露不降民多疾病寒蟬不鳴人臣力爭處暑之日鷹乃祭鳥後五日天地始肅後五日農乃登穀

白虎通德論曰七月律謂之夷則何夷傷則法也言萬物始傷被刑法也歐陽公秋聲賦云其

爲樂也商聲主西方之音夷則爲七月之律商傷也物旣老而悲傷夷戮也物旣盛而當殺

晉樂志曰七月之辰謂之申申者身也言時萬物身體皆成就也

夏小正曰七月獬子肇肆肇始也肆遂也言其始遂也

詩七月曰七月流火又曰七月鳴鴈又曰七月烹葵及菽又曰七月食瓜注云流下也火大火也李白詩云火落金風高謝靈運詩云火逝首

秋節七命云龍火西頽

提要錄曰七月爲蘭月

纂要曰七月爲首秋上秋蘭秋肇秋

月令曰孟秋行冬令則陰沍大勝介蟲敗穀戎
兵乃來行春令則其國乃旱陽氣復還五穀無
實行夏令則國多火災寒熱不節民多瘡疾

仲秋月

月令曰仲秋之月日在角昏牽牛中旦觜觴中
律中南呂盲風至鴻雁來立鳥歸羣鳥養羞日

夜分雷乃收聲蟄蟲坯戶殺氣浸盛陽氣日衰
水始涸

孝經緯曰處暑後十五日斗指庚爲白露後十
五日斗指酉爲秋分

三統厯曰白露爲八月節秋分爲八月中氣白
露者陰炁漸重露濃色白

周書時訓曰白露之日鴻雁來後五日玄鳥歸
後五日羣鳥養羞鴻雁不來遠人背叛玄鳥不
歸室家離散羣鳥不羞臣下驕慢秋分之日雷

乃始收後五日蟄蟲坯戶後五日水始涸雷不
始收聲諸侯淫汰蟄蟲不坯戶民靡有賴水不
始涸介蟲爲害

白虎通德論曰八月律謂之南呂何南者任也
言陽氣尙有任生齊麥也故陰拒之也

晉樂志曰八月之辰謂之酉酉者緇也謂時物
皆緇縮也

夏小正曰八月辰則伏丹鳥羞白鳥白鳥蚊蚋
也崔豹古今註云螢火一名丹鳥腐草化之羞

進也謂食蚊蚋也

詩七月曰八月萑葦又曰八月載績又曰八月其穫又曰八月剝棗又曰八月斷壺註云藪爲萑葦爲葭載績者絲事畢而麻事起其穫者禾可穫也剝擊也壺瓠也

提要錄曰八月爲桂月

纂要錄曰八月曰仲商

月令曰仲秋行春令則秋雨不降草木生榮國乃有恐行夏令則其國乃旱蟄蟲不藏五穀復

生行冬令則風災數起收雷先行草木蚤死

季秋月

月令季秋之月日在房昏虛中旦柳中律中無射鴻雁來賓雀入大水爲蛤菊有黃華豺乃祭獸戮禽草木黃落蟄蟲咸俯在內皆墜其戶
孝經緯曰秋分後十五日斗指辛爲寒露後十五日斗指戌爲霜降

三統歷曰寒露爲九月節霜降爲九月中氣寒露者言露氣寒將欲凝結

周書時訓曰寒露之日鴻雁來賓後五日雀入大水爲蛤後五日菊有黃華霜降之日豺祭獸後五日草木黃落後五日蟄蟲咸俯

白虎通德論曰九月謂之無射何射者終也言萬物隨陽而終也

晉樂志曰九月之辰謂之戌戌者滅也謂時物皆衰滅也

夏小正曰九月內火注云大火心星也

詩七月曰九月授衣又曰九月叔苴又曰九月

滌塲圃又曰九月肅霜注云叔拾也苴麻子也
肅縮也霜降而收縮萬物也

國語曰至于亥月注云九月爲亥月范蠡曰王
姑待至於亥月漢韓明府修孔子廟器表碑曰
永壽二年霜月之靈說者疑是九月

提要錄曰九月爲菊月

纂要曰九月曰暮秋末秋季商杪秋亦曰霜辰
亦曰授衣

月令曰季秋行夏令則其國大水冬藏殃敗民

多飢噎行冬令則國多盜賊邊境不甯土地分裂行春令則煖風來至民氣懈惰師興不居

仙掌露

前漢班固傳武帝建章宮露盤上有仙人掌承露和玉屑飲之金莖銅柱也神農本草云繁露水是秋露繁濃時也作盤以收之煎令稠可食之延年不飢漢武帝時東方朔得立黃青露各盛五合帝賜羣臣老者皆少病者皆除東方朔曰日初出處露皆如糖可食後武帝立金莖作

仙人掌承露盤取雲表之露服食之以求仙文
選孟堅西都賦云抗仙掌以承露擢雙立之金
莖張平子西京賦云承雲表之清露

青女霜

淮南子秋三月氣不藏百蟲蟄青女乃出以降
霜雪注云青女乃天神青腰玉女主霜雪也杜
甫詩云飛霜任青女賜被隔南宮山谷詩云姮
娥攜青女一笑粲萬瓦李商隱詩云青女素娥
俱耐冷月中霜裏鬥嬋娟呂夷簡詩云花愁青

女再飛霜

蓼花風

月令章句仲秋白露節育風至鄭玄云疾風也
秦人謂之蓼花風梁文帝初秋詩云育風度函
谷墜露下芳枝

裂葉風

洞冥記裂葉風乃八月節也

離合風

陸機要覽列子御風而行常以立春歸於八荒

立秋日遊於風穴風至則草木皆生去則草木搖落謂之離合風

鯉魚風

提要錄鯉魚風乃九月風也李賀詩云樓前流水江陵道鯉魚風起芙蓉老又古詞云瑞霞成綺映舴艋棹輕鯉魚狂風起

黃雀雨

提要錄九月雨爲黃雀雨羅鄂州詞云九月江南秋色黃雀雨鯉魚風

荳花雨

荆楚歲時記荳花雨乃八月雨也

荻苗水

水衡記黃河水七八月名荻苗水荻花正開也

登高水

水衡記黃河水九月名登高水

一葉落

淮南子一葉落而天下知秋韓文公詩云淮南悲葉落今我亦傷秋唐人詩云山僧不解數甲

子一葉落知天下秋韋蘇州詩云新秋一葉落

草木衰

文選宋玉九辨悲哉秋之氣也皇天平分四時
兮竊獨悲此凜秋蕭瑟兮草木搖落而變衰沈
寥兮天高而氣清寂寥兮收潦而水清僚慄兮
若在遠行李白詩云深秋宋玉悲老杜詩云搖
落深知宋玉悲又云清秋宋玉悲陳簡齋詩云
宋玉有文悲落葉

警鶴鳴

風土記鳴鶴戒露白鶴也此鳥性警至八月白露降卽鳴而相警東坡詩云由來警露雀

石鴈飛

南康記平固縣覆笥山上有湖中有石鴈浮于湖上每至秋飛鳴如候時也

鰕魚肥

海錄碎事棟木華而石首至秋風起而鰕魚肥

蟋蟀吟

天寶遺事每秋時宮中妃妾以小金籠閉蟋蟀

置枕函畔夜聽其聲時民間爭倣之

親燈火

昌黎文韓退之送子阿符讀書城南詩云時秋
積雨霽新涼入郊墟燈火稍可親簡編可卷舒

圍棋局

西京雜記戚夫人侍兒賈佩蘭言宮中八月四
日出雕房北戶竹下圍碁勝者終年有福負者
終年多病取絲縷就北辰星下求長命乃免

秋菊酒

唐書李適爲學士凡天子饗會游豫唯宰相及學士得從秋登慈恩浮圖獻菊花酒稱壽

思蓴鱸

晉文苑傳張翰字季鷹吳郡人爲齊王冏東曹掾見秋風起思吳中菰米蓴鱸魚膾嘆云人生貴得適志何能羈宦數百里外以要名爵乎乃嘆云秋風起兮木葉飛吳江水清鱸魚肥遂命駕而歸後齊王敗人皆謂之見機又海物異名記云江南人作鱸名郎官鱸言因張翰得名

東坡詩云浮世功名食與眠季鷹直得水中仙
不須更說知機早直爲鱸魚也自賢又送人歸
吳有詞云更有鱸魚堪切膾山谷詩云東歸止
爲鱸魚膾未敢知言許季鷹王荊公詩云慷慨
秋風起悲歌不爲鱸

收兔毫

墨藪筆取崇山絕仞中兔毛八九月收之筆頭
長一寸管長五寸鋒齊腰彊者揮襟作之屈曲
眞草皆須盡一身之力而送之

驗美玉

地鏡經入月中草木獨有葉枝下垂者必有美玉又云八月後草木死者亦有玉

點艾枝

文昌雜錄唐歲時節物八月一日有點艾枝盧公範饋餉儀云點炙枝以梨枝爲之反銀盞中有硃砂銀枝子也

厭兒疾

荆楚歲時記八月十日酒民以朱點小兒頭名

爲天災以厭疾也

取柏露

續齊諧記鄧紹入月朝入華山見一童子以五
絲囊承取柏葉上露皆如珠子且云赤松先生
取以明目今人八月朝作眼明袋是也又荆楚
歲時記云四民並以錦絲爲眼明囊云赤松子
以八月囊承柏樹露爲宜眼後世以金箔爲之
遞相餉遺

結絲囊

隋唐嘉話八月五日明皇生辰號千秋節王公
戚里進金鏡士庶結承露絲囊相遺述征記云
八月作五明囊盛百草露以洗眼

登南樓

晉史庾亮傳亮鎮武昌諸佐吏殷浩之徒秋夜
乘月共登南樓俄而亮至諸人將起避之亮徐
曰諸君小住老子於此興復不淺便據胡牀與
浩等談詠竟夕其坦率如此陶侃曰亮非惟風
流更有爲政之實也老杜詩云月靜庾公樓

懷故里

提要錄王榮觀秋月懷弟妹故里而傷神老杜詩云曉鶯工迸泪秋月解傷神注云春鶯秋月人所賞翫而鶯所工者在于迸人之淚月所解者在于傷神之人蓋亂離疾病之所感也

悲遊子

梁史江淹過灞陵秋深葉脫乃嘆曰何限風物寥落祇悲遊子故園之思老杜詩云風物悲遊子江山憶故人

歎謫仙

文粹李白秋興歌我覺秋興逸誰云秋興悲賀知章見之曰是子謫仙人也

賞白蓮

天寶遺事明皇八月太液池有千葉白蓮數枝盛開帝與貴戚宴賞左右皆嘆羨久之帝指貴妃示左右爭如我解語花古詞云翠蓋盈盈紅粉面葉底荷花解語

水晶宮

源隱叢話吳興謂之水晶宮而不載之圖經惟
吳興集有之刺史楊漢公九月十五日夜絕句
云江南地煖少嚴風九月炎涼正得中溪上玉
樓樓上月清光合在水晶宮疑因此而得名也

歲時廣記卷第三

歲時廣記卷第四

廣寒僊裔陳

元說

編

冬

禮記鄉飲酒曰北方曰冬冬之爲言中也中者藏也管子曰冬者陰之畢下伏萬物尸子曰冬爲信淮南子云冬爲權權者所以權萬物也權正而不失萬物乃藏前漢律厯志曰大陰者北方北伏也陽炁伏於下於時爲冬冬終也物終藏乃可稱水潤下智者謀謀者

重故爲權也又日月令冬三月其日壬癸其
帝顓頊其神玄冥其蟲介其音羽其數六其
味醢其臭朽其祀行祭先賢

孟冬月

禮記月令曰孟冬之月日在尾昏危中旦七星
中律中應鍾水始冰地始凍雉入大水爲蜃虹
藏不見天氣上騰地氣下降天地不通閉塞而
成冬

孝經緯曰霜降後十五日斗指乾爲立冬後十

五日斗指亥爲小雪

三統歷曰立冬爲十月節小雪爲十月中氣小雪大雪者以霜雨凝結而雪十月猶小十一月轉大

周書時訓曰立冬之日水始冰後五日地始凍後五日雉入大水爲蜃小雪之日虹藏不見後五日天氣上騰地氣下降後五日閉塞而成冬白虎通德論曰十月律謂之應鍾何鍾動也言萬物應陽而動下藏也

晉樂志云十月之辰謂之亥亥者劾也言時陰氣劾殺萬物也

夏小正曰十月黑鳥浴黑鳥烏也浴也者謂飛乍上乍下也

詩七月曰十月隕箠又曰十月蟋蟀入我牀下又曰十月穫稻又曰十月納禾稼又曰十月漈場

左傳莊公十六年公父定叔使以十月入曰良月也就盈數焉

西京雜記曰陰德用事則和氣皆陰建亥之月是也故謂之正陰之月又曰十月陰雖用事而陰不孤立此月純陰疑於無陽故亦謂之陽月歐陽公詞曰十月小春梅藥綻

纂要曰十月曰上冬

月令曰孟冬行春令則凍閉不密地氣上泄民多流亡行夏令則國多暴風方冬不寒蟄蟲復出行秋令則霜雪不時小兵時起土地侵削

仲冬月

月令曰仲冬之月日在斗昏東壁中旦軫中律
中黃鍾冰益壯地始圻鶡旦不鳴虎始交芸始
生荔挺出蚯蚓結麋角解水泉動

孝經緯曰小雪後十五日斗指壬爲大雪後十
五日斗指子爲冬至

三統厯曰大雪爲十一月節冬至爲十一月中
氣

周書時訓曰大雪之日鶡旦不鳴後五日虎始
交後五日荔挺出冬至之日蚯蚓結後五日麋

角解後五日水泉動

白虎通德論曰十一月律謂之黃鍾何黃中和之色鍾者動也言陽氣動於黃泉之下動養萬物也

晉樂志曰十一月辰謂之子子者孳也言陽氣至此更孳生也

夏小正曰十一月王狩言王狩之時也冬獵爲狩

呂氏春秋曰仲冬命之曰暢月注云暢充也

月令曰仲冬行夏令則其國乃旱氛霧冥冥雷
乃發聲行秋令則天時雨汁瓜瓠不成國有大
兵行春令則蝗蟲爲敗水泉咸竭民多疥癩

季冬月

月令曰季冬之月日在婺女昏婁中旦氏中律
中大呂雁北鄉鵲始巢雉雊雞乳征鳥厲疾冰
方盛水澤腹堅日窮于次月窮於紀星回于天
數將幾終歲且更始

孝經緯曰冬至後十五日斗指癸爲小寒後十

五日斗指丑爲大寒

三統曆曰小寒爲十二月節大寒爲十二月中
氣小寒大寒者十二月極寒之時相對爲大小
月初爲小寒月半爲大寒也

周書時訓曰小寒之日雁北鄉又後五日鵲始
巢又五日雉始雊雁不北向民不懷土鵲不始
巢一國不甯雉不始雊國乃大水大寒之日雞
始乳又五日鷺鳥厲疾又五日水澤腹堅雞不
始乳淫女亂男鷺鳥不厲國不除兵水澤不腹

堅言乃不從

白虎通德論曰十二月律謂之大呂何大大也
呂者拒也言陽氣欲出陰不許也呂之爲言拒
者旅抑拒難之也

晉樂志曰十二月之辰謂之丑丑者紐也言終
始之際故以紐結爲名也

夏小正曰十二月亥駒賁亥駒蟻也賁者走於
地中也

纂要曰十二月曰暮冬亦曰抄冬涂月暮節暮

歲窮稔窮紀

月令曰季冬行秋令則白露蚤降介蟲爲妖四
鄙入保行春令則胎夭多傷國多固疾命之曰
逆行夏令則水潦敗國時雪不降冰凍消釋

一色雲

韓詩外傳凡草木花多五出雪花獨六出雪花
曰霰雪雲曰同雲同謂雲陰與天同爲一色也
故詩云上天同雲雨雪雰雰

一丈凍

郭義恭廣記北方地寒冰厚三尺地凍一丈

千里雪

楚詞層冰峨峨飛雪千里王逸注云北極常寒也東坡詩云峨眉山西雪千里謝燮雨雪曲云峨峨六尺冰飄飄千里雪

千年冰

杜陽雜編順宗卽位年拘弭國貢常堅冰云其國有大凝山其中有冰千年不釋及齋至京師潔冷如故雖盛暑赭日終不消嚼之與中國冰

凍無異又神異經云北方有層冰萬里厚百丈
尸子曰朔方之寒冰厚六尺北極左右有不釋
之冰漢五行志云元和間琅邪井冰厚丈餘

紺碧霜

拾遺記廣延國霜色紺碧又云曠州霜甘也漢
武帝內傳曰仙家上藥有立霜紺雪

入液雨

瑣事錄閩俗立冬後過壬日謂之入液至小雪
出液得雨謂之液雨無雨則主來年旱諺云液

雨不流箨高田不要作又謂之藥雨百蟲飲此
水而蟄林公弁詩云液雨初生小院寒

復槽水

水衡記黃河水十月名復槽水落復故道也

感凌水

水衡記黃河水十一月十二月名感凌水冰斷
復結感起成層也

寶硯爐

天寶遺事內庫有七寶硯爐一所曲盡其巧每

冬寒硯凍置於爐上硯冰自消不勞置火冬月帝用之

煖玉鞍

天寶遺事岐王有玉鞍一面每至冬月則用之雖天氣寒嚴此鞍在座下如有溫火之氣

煖金合

裴鉦傳奇進士張無頗過袁天罡女袁大孌受藥以煖金合盛之曰寒時值出此合則一室暄熱不假爐炭矣合乃廣利王宮中之寶

卻寒簾

杜陽雜編咸通九年同昌公主下降賜錢五百萬貫仍罄內庫寶貨以實其宅更賜金麥銀米數斛堂設連珠之帳續真珠以成也卻寒之簾類玳瑁班有紫色云卻寒鳥骨所爲也則未知出何國

卻寒犀

杜陽雜編同昌公主堂中設卻寒犀又綴五色香囊於辟寒香前輩詩云辟寒犀外凍雲平

禦寒毯

提要錄 大祖登極九州各貢方物燕國劉大王守光使進禦寒毯一牀

辟寒金

古今詩話噉寒鳥出昆明國形如雀色黃魏明帝時其國來獻飼以眞珠及兔腦常吐金屑如粟宮人爭取爲釵鈿名之辟寒金此鳥不畏寒也宮人相嘲曰不取辟寒金那得帝王心不服辟寒鈿那得帝王憐古樂府云誰似辟寒金聊

借與空牀煖

辟寒香

述異記漢武帝時外國貢辟寒香室中焚之雖大寒必減衣

衣狐裘

呂氏春秋曰衛靈公天寒鑿池言不寒宛春曰君衣狐裘坐熊席四隅有火所以不寒

設熊羆

拾遺記周靈王起昆昭之臺設狐腋素裘紫羆

文褥一人以指彈席上而暄風入室裘褥皆棄
墜下

捏鳳炭

天寶遺事楊國忠以炭屑用蜜捏塑成雙鳳至
冬至日則燂於爐中及先以白檀木鋪于爐底
餘灰不許參雜

置鳳木

杜陽編李輔國嚴凝之時置鳳首木于高堂大
厦中其木高一尺而雕刻如鸞鳳之形和煦之

氣如二三月故別名常春木

呵牙筆

天寶遺事李白嘗于便殿對明皇撰詔詰時十月大寒筆凍莫能書字帝敕宮嬪十人侍於李白左右令冬各執牙筆呵之白遂取而書詔李白之受聖睠也如此之厚

得玉馬

臧榮緒續晉書新蔡王騰發于并州常山之真定縣遇天大雪平地數丈融不積騰發恠而掘

之得玉馬高尺許上表獻之藜藿野人立春詩
云玉馬自能消朔雪土牛更爲發春風

炷煖香

雲林昇景志寶雲溪有僧舍盛冬若客至不燃
薪火煖香一炷滿室如春眉克愛題西山禪房
詩云煖香炷罷春生室始信壺中別有天

吐氣火

葛仙翁別傳公與客談話時天寒仙翁謂客曰
居貧不能人人得爐火請作一大火共致煖者

仙公因吐氣火從口中出須臾火滿室客皆熱脫衣也

煮建茗

開元遺事逸人王休居太白山下日與僧道异人往還每至冬日取冰敲其精瑩者煮建茗以供賓客飲之

飲羔酒

提要錄世傳陶穀學士買得黨太尉家故妓遇雪陶取雪水烹團茶謂妓曰黨家應不識此妓

曰彼粗人安有此景但能于銷金帳下淺酌低
唱飲羊羔酒耳陶默然愧其言東坡詩云試問
高吟三十韻何如低唱兩三杯

作妓圍

天寶遺事申王每冬月苦寒之際令宮女密圍
於坐側以禦寒氣謂之妓圍

揣妓肌

天寶遺事岐王每冬寒手冷不近火惟于妙妓
懷中揣其肌膚爲之煖手

選肉陣

開元遺事楊國忠選婢妾肥大者行列於前令遮風謂之肉陣

煖寒會

開元遺事巨豪王元寶每冬月大雪之時令僕夫掃雪爲徑躬立坊前迎揖賓客具酒炙宴之爲煖寒會

送臘粥

皇朝東京夢華錄十二月都城賣散佛花至初

八口有僧尼三五爲羣以盆盛金銅佛像浸以香水楊柳洒浴排門教化諸大寺作浴佛會并送七寶五味粥謂之臘八粥都人是日亦以果子雜料煮粥而食

省爇火

前漢書冬民旣入婦人同巷相從夜績一月得四十五日以省爇火同巧拙而合習俗也

爇力召反

溫母席

搜神記羅威字德行少喪父事母至孝母年七

十天大寒常以身自溫席而後授其母

煖母枕

東觀漢記黃香字文疆江夏安陸人事母至孝
每冬寒則身煖枕席夏則扇之使涼東坡詩云
願子歟爲江夏枕不勞揮扇自甯親

扣冰魚

孝子傳王祥少有德行事後母至孝盛寒冰凍
網罟不施母欲生魚祥解褐扣冰求之忽冰開
有雙魚躍出祥獲以奉母時人謂之至孝所致

黃氏本後章云臥冰泣竹慰母心

號林笋

楚國先賢傳左臺御史孟宗事後母至孝母性嗜筍及母亡冬節至宗入林哀號而筍生以供祭祀杜甫詩云遠傳冬筍味更覺綵衣春

問歲餘

魏畧董遇好學人從學者遇不肯教云當先讀書百遍而義自見學者云苦暇無日遇曰當以三餘或問三餘之意遇曰冬者歲之餘夜者日

之餘聞者月之餘

又見任彥升策

山谷詩云皇文開萬

卷家學陋三餘東坡詩云酒飽高眠眞事業此生有味在三餘

足文史

漢書方朔自言年十三學三冬文史足用注云貧于冬日乃得學

歲時廣記卷第四